



Višegradska 26, 71000 Sarajevo, Bosna i Hercegovina; tel/fax +387 33 474 033; info@cped.ba; www.cped.ba

CENTAR ZA
PROMOCIJU
CIVILNOG
DRUŠTVA

**Centar za promociju civilnog društva
Sarajevo, Bosna i Hercegovina**

GODIŠNJI IZVJEŠTAJ 2010

mart 2011

Uvodna riječ

Zadovoljstvo mi je da predstavim Godišnji izvještaj o aktivnostima i finansijskom poslovanju Centra za promociju civilnog društva (CPCD) za 2010. godinu. Drago mi je da imam priliku da javnosti ponudim na uvid pregled dostignuća našeg Centra u toku prošle godine, u širokom obimu aktivnosti, u dvije glavne programske oblasti: Civilno društvo i Javna politika.

Ovaj izvještaj je predstavljen u odnosu na najvažnije izazove sa kojima se suočilo civilno društvo u BiH u protekloj godini, i koji su bili impuls za neke od ključnih inicijativa koje je pokrenuo CPCD, uključujući organizovanje građana za rješavanje problema na lokalnom nivou, monitoring javnih politika, uvođenje sistema osiguranja kvaliteta za NVO, uspostavljanje institucionalnih oblika saradnje vladinog i nevladinog sektora, saradnja poslovnog i neprofitnog sektora, jačanje lokalnih organa uprave, razvijanje Resursnog centra i regionalna saradnja sa nevladinim organizacijama iz susjednih država i Evropske unije.

Uporedo sa implementacijom svojih osnovnih aktivnosti, Centar za promociju civilnog društva je investirao puno napora i sredstava u dalji razvoj svojih ljudskih resursa. Većina našeg osoblja je prošla kroz sveobuhvatan i intenzivan program izgradnje kapaciteta (ukupno 742 sata edukacija tokom 2010. godine, što iznosi 37 sati edukacije prosječno po zaposleniku). Ovaj program je obuhvatio teme poput NVO standarda kvaliteta, pisanje projekata za EU, finansijsko izvještavanje, upravljanje projektom, logički okvir i slično. Ove mjere su omogućile da uspješno ostvarimo svoj plan za 2010. godinu, kao i da se pripremimo za uspješnu realizaciju plana u 2011. godini.

CPCD je i tokom godine koja je iza nas bio član nekoliko međunarodnih i domaćih mreža i asocijacija: Mreža Sporazum plus, ECAS iz Brisela, Asocijacija za kvalitet BiH, Balkanska mreža za razvoj društveno odgovornog poslovanja, Mreža pravde, NVO vijeće.

U januaru 2010. godine Centar za promociju civilnog društva je uradio strateški plan za period 2010 – 2012. godina, koji je prije usvajanja prodiskutovan sa našim korisnicima, partnerima i donatorima. Tokom godine smo odradili veliki dio posla na uvođenju sistema osiguranja kvaliteta, a sa tim važnim poslom ćemo nastaviti i tokom 2011. godine.

Tokom naredne godine, CPCD će nastaviti sa provođenjem svoje misije i glavnih ciljeva, koji su zacrtani na osnovu dostignuća i naučenih lekcija iz prošle godine. Za tu namjenu smo razvili niz projekata i drugih aktivnosti čiji je glavni cilj da na odgovarajući način, uz kreativan i svjež pristup, odgovorimo na najvažnije savremen izazove izgradnje demokratije i civilnog društva u našoj zemlji. Posebno važan dio plana za 2011. godinu je dalje unapređenje znanja i vještina zaposlenih u CPCD, kao i jačanje aktivnosti Resursnog centra.

Željela bih da izrazim zahvalnost svim našim donatorima, stranim i međunarodnim vladinim i privatnim agencijama i fondacijama koje su moralno i finansijski podržali aktivnosti našeg Centra u 2010. godini. Takođe želim da srdačno zahvalim našim brojnim saradnicima i partnerskim organizacijama iz cijele BiH za podršku, posvećenost i entuzijazam u inicijativama koje zajedno poduzimamo, nadajući se nastavku i proširenju saradnje u budućnosti.

Aida Daguda, direktorica CPCD

CPCD – ukratko o organizaciji

Centar za promociju civilnog društva osnovan je 10. 06. 1996. godine. Registrovan je kod nadležnog suda u Sarajevu 15. 07. 1996. godine pod brojem: R-I-128/96. U skladu sa Zakonom o udruženjima građana Federacije BiH, izvršena je preregistracija i usklađivanje sa Zakonom 14. 07. 2000. godine pod brojem: 04-05-2-3813/2000.

CPCD je krajem 2010. godine imao 25 zaposlenih na puno radno vrijeme (uključujući 8 radnika zaposlenih u projektu GAP2), i jednog volontera, smještenih u glavnoj kancelariji u Sarajevu i u 4 kancelarije GAP projekta u Mostaru, Banja Luci, Sarajevu i Tuzli.

Misija:

Doprinos jačanju civilnog društva u BiH kroz pružanje podrške razvoju organizacija civilnog društva i njihovoj međusobnoj saradnji i umrežavanju, uspostavljanje okvira za efikasne odnose sa vladinim i profitnim sektorom i razvoj građanskog aktivizma, kao i kroz promociju neprofitnog sektora kao kvalitetnog i nezaobilaznog aktera u društveno-ekonomskom razvoju zemlje.

Vizija:

Interna vizija: CPCD je nezavisna, stabilna i visoko profesionalna organizacija koja pruža kvalitetne programe i usluge za podršku razvoju civilnog društva, saraduje sa brojnim partnerima u BiH i regionu i predstavlja bitan faktor u borbi za bolji život građana BiH. CPCD svoje djelovanje zasniva na motivaciji, znanju i idejama svojih zaposlenika i volontera, koji su upotpunosti posvećeni ostvarivanju misije organizacije.

Eksterna vizija: Društvo informisanih, obrazovanih i odgovornih građana, aktivno uključenih u borbu sa izazovima sa kojima se današnje BiH društvo suočava kao i efikasna, odgovorna i sposobna vlast na svim društvenim nivoima.

Glavni programi i aktivnosti:

Svoje programske ciljeve CPCD je tokom 2010. godine realizovao kroz sljedeće glavne programe:

1. Javna politika,
2. Civilno društvo
3. Resursni centar

U okviru gore navedenih programa CPCD vodi sljedeće aktivnosti:

- Dizajniranje, upravljanje i implementacija spektra operativnih projekata koji tretiraju ključna pitanja demokratije i izgradnje civilnog društva u BiH;
- Obezbjedenje primjerenog treninga i usluga konsultacija te programa za službenike javnog sektora, izabrane predstavnike, lidere i aktiviste organizacija civilnog društva, kao i cijelu društvenu zajednicu, sa ciljem jačanja kapaciteta za bolju upravu u skladu sa prioritetima BiH vlasti;
- Vođenje kampanja javnog zagovaranja usmjerenih na promjenu politike, pozicije i programa institucija vlasti u segmentu javnog i privatnog sektora;
- Umrežavanje i saradnja sa institucijama javne administracije, kako u zemljama EU, tako i zemljama Centralne, Istočne i Jugoistočne Evrope;

- Planiranje i implementacija studijskih posjeta za službenike javnog sektora i izabrane predstavnike sa svih nivoa vlasti u BiH, kao i za lidere i aktiviste civilnog društva, sa ciljem razmjene iskustava, informacija i znanja sa njihovim pandanima u inostranstvu.
- Jačanje bosanskohercegovačkog nevladinog sektora kroz rad Resursnog centra

Kontakt:

Poštanska adresa: Višegradska 26, 71000 Sarajevo

Telefon/fax: 033 474 033

E-mail: info@cpcd.ba

Web sajt: www.cpcd.ba, www.civilnodrustvo.ba i www.sporazum.ba

PROGRAM JAVNA POLITIKA

PROJEKAT UPRAVNE ODGOVORNOSTI, FAZA II (GAP2)

Donator: Chemonics, kao nosilac projekta GAP2

Projekat upravne odgovornosti, Faza II (GAP) je projekat u vrijednosti od 30 miliona USD, u trajanju od pet godina, kojeg sufinansiraju Američka agencija za međunarodni razvoj (USAID), Švedska agencija za međunarodni razvoj (Sida), i Ambasada Kraljevine Nizozemske (EKN).

CPCD je lokalni partner Chemonicsu u implementaciji ovog projekta, kao i Urban Institute, VNG International i SI PU International.

Projekat je zajednički finansiran od strane Američke agencije za međunarodni razvoj i pomoć (USAID), Ambasade Kraljevine Nizozemske i Švedske agencije za međunarodni razvoj (Sida). Cilj programa je osigurati tehničku pomoć jačanju demokratske lokalne uprave u Bosni i Hercegovini, značajno i vidljivo unapređujući sposobnost općina da pružaju usluge građanima i razvijaju strateški i fiskalni okvir, što vodi ka odgovornoj demokratskoj upravi.

Kako bi postigli postavljene ciljeve, projekat je organiziran u dvije osnovne komponente: Lokalne intervencije i Intervencije u zakonodavstvu. Komponenta lokalnih intervencija pruža direktnu tehničku i materijalnu pomoć **41** općini iz prve faze i **31** novoj partnerskoj općini, kako bi unaprijedili pružanje usluga u općinama, rad administracije, budžetsko i finansijsko upravljanje, kao i kapacitete općina da implementiraju projekte kapitalnih investicija. Komponenta intervencija u zakonodavstvu radi prvenstveno preko dva saveza općina i gradova, kako bi osigurala tehničku pomoć parlamentarnim tijelima i ministarstvima na državnom, entitetskom i kantonalnom nivou uprave u cilju jačanja među-upravne komunikacije, promoviranja odgovorne fiskalne i funkcionalne decentralizacije i unapređenju procesa zajedničkog nastupa općina prema višim nivoima vlasti.

Uloga CPCD u projektu je da pruži tehničku pomoć u okviru komponente Lokalne intervencije, što uključuje administraciju za određeni broj opštinskih koordinadora, smještenih u 4 ureda GAP: u Mostaru, Tuzli i Banja Luci i Sarajevu. CPCD također obezbjeđuje stručnu podršku realizaciji programa u okviru svog područja rada.

IZGRADNJA DOBRE UPRAVE KROZ GRAĐANSKO UKLJUČIVANJE PROGRAM MALIH GRANTOVA

Donator: SIDA (Švedska razvojna agencija)

Program malih grantova je namijenjen za jačanje aktivnog građanskog učešća i uključivanje pojedinaca i grupa u društvene promjene u zajednici u kojoj žive, kao i za osposobljavanje organizacija civilnog društva da svojim znanjem i vještinama na najbolji način predstavljaju svoju ciljnu grupu i članstvo.

Podnaslov projekta „*Realizacija potencijala građana i organizacija civilnog društva (OCD) u BiH za promjene*“ adresira upravo ono što je jedan od glavnih ciljeva, a to je da ponovo motivišemo organizacije civilnog društva i građane u BiH da učestvuju u javnom životu i procesima donošenja odluka te u rješavanju pitanja koja smatraju važnim. Smatramo da smo u protekloj godini prepoznali najbolje od prijavljenih projekata koji su najbolje oslikavali građanski aktivizam kroz tri aktivnosti – vidim, djelujem, mijenjam! Ukupno 346 prijavljenih projekata i koncept papira dokazuju da civilno društvo u Bosni i Hercegovini ima potencijal za činjene promjena, ali su manjkavosti nedovoljne/nepotpune vještine organizacija civilnog društva i nedostatak finansijske podrške.

PMG je razvijen da odgovori na ove prepreke u nedostatku vještina i finansijskih sredstava, da ohrabri i podrži različite segmente civilnog društva u zajednici, da bazične organizacije razviju zajedničke i koncentrisane politike i zagovarački rad kao i da se podrže lokalne inicijative sa ciljem promovisanja volonterskog angažmana, filantropije, pomaganja osobama sa dodatnim potrebama, rješavanju lokalnih infrastrukturnih problema, uključenjem neformalnih grupa, itd.

Na Javni poziv koji se odnosio na podršku razvoju zagovaračkih kapaciteta stiglo je 89 projekata od čega je podržano 17 sa preko 78.000 KM. U okviru ovih projekata ostvarena su 233 nova kontakta (sastanka, konsultacije, razgovori itd.) između vlasti i organizacija civilnog društva. U implementaciji kampanja javnog zagovaranja su učestvovala 84 organizacije, preko 5500 građana, 421 volonter i 600 članova različitih organizacija civilnog društva. Projekti su kroz ovaj javni poziv doprinijeli povećanom učešću građana i nevladinih organizacija u procesu donošenja odluka, povećanom nivou odgovornosti predstavnika vlasti pri rješavanju problema stanovništva, poboljšanoj komunikaciji i partnerstvu između organizacija civilnog društva i vlasti, jačanju javnog kritičizma usmjerenom prema pojedincima i institucijama vlasti koji ne iskazuju spremnost i odgovornost za rješavanje problema građana, porastu ugleda sektora civilnog društva i preuzimanju uloge stvarnog korektivnog faktora u našem društvu te tehničkim i institucionalnim vještinama i znanjima organizacija civilnog društva.

Na javni poziv koji se odnosio na lokalne inicijative pristiglo je 257 koncept papira, od čega je zbog ograničenih finansijskih sredstava podržano 16 projekata u vrijednosti preko 76.000,00 KM. Preko 800 građana (članova organizacija, korisnika i sl.) je implementiralo lokalne inicijative. Više od 450 volontera je radilo 4600 sati. Preko 15 lokalnih vlasti i institucija je bilo uključeno u implementaciju lokalnih inicijativa kroz besplatno pružanje različitih usluga (besplatan prostor, građevinska dozvola, novčana sredstva, medijsko pokrivanje isl.). Odobreni projekti su imali za cilj aktivno uključiti širok krug korisnika u

realizaciju aktivnosti i promovisati pristup samopomoći, mobilisati socijalni potencijal u lokalnim zajednicama, promovisati i ohrabriti volonterski rad u zajednici, promovisati lokalno partnerstvo i međusektorsku saradnju te promovisati i ohrabriti lokalnu filantropiju i socijalnu odgovornost.

Posebna komponenta Programa malih grantova je tzv. Ad hoc komponenta čiji je osnovni cilj je da omogući fleksibilnost ovom programu u smislu obezbjeđenja finansijske podrške inicijativama/projektima koji traže trenutnu reakciju i odgovor na iskazanu potrebu. U 2010. godini iz Ad Hoc fonda podržano je 5 inicijativa u vrijednosti preko 12.000 KM.

Kroz komponentu podrške razvoju kapaciteta organizacija civilnog društva smo počeli razvijati mentorski program koji ima dvojaku ulogu. S jedne strane mentorstvo je pomoć organizacijama civilnog društva da poboljšaju svoj rad ne samo u jednoj oblasti, nego da uče i razvijaju saradnju sa lokalnim vlastima i institucijama, da uče korake u projektnom ciklusu, da razvijaju svoje vještine u monitoringu, evaluaciji, vođenju organizacija itd. S druge strane, mentorski program se provodi u saradnji sa mrežom regionalnih resursnih centara što predstavlja model koji promovišu sve međunarodne institucije a to je da „jače, razvijenije organizacije pomažu onim slabijim“. Tokom 2010. godine održana su 94 mentorska sastanka sa preko 267 sati koje je obavilo 8 mentora.

JACANJE PARLAMENTATA U BIH

Donator: USAID

Projekat implementira State University of New York, uz finansijsku podršku USAID-a. CPCD je partner u implementaciji projekta, u sprovedbi aktivnosti u Srednjobosanskom kantonu. Cilj projekta je da se na rješavanje definisanog problema u lokalnoj zajednici, koji za svoje rješavanje evidentno prevazilazi nadležnost i kapacitete lokalne samouprave, uključe izabrani parlamentarci PS BiH i Parlamenta FBiH, ali po potrebi i kantonalnih skupština.

Čitav proces je baziran na više elemenata ali je najvažniji učesnički/participativni pristup koji podrazumijeva uključenje adekvatnog broja relevantnih aktera parlamentaraca, građana i predstavnika NVO, predstavnika lokalne uprave i samouprave te utemeljena argumentacija za provodljivost, odnosno realna perspektiva kreiranog akcionog plana za dolazak do rješenja definisanog problema.

Odabrane teme u opštini Bugojno su:

- prenos prava raspolaganja državnom imovinom na opštinu,
- upravljanje i odlaganje krutog otpada, izgradnja spalionice te lokacije za centralnu sanitarnu deponiju, odnosno saniranje divljih deponija,
- problem upravljanja objektima u etažnom vlasništvu
- problem poplava i uloga Civilne zaštite u kontekstu prevencije i saniranja posljedica poplava

U opštini Travnik su razmatrane teme:

- upravljanje i odlaganje krutim otpadom, naknada za te komunalne usluge, izgradnja pretovarne stanice koja bi podmirivala regionalne potrebe, uključenje kancelarije grada Lajpciga kao grada pobratima i u navedene aktivnosti;
- rješavanje pitanja i problema vezanih za omladinsku politiku i lokacije za omladinski centar,
- pitanje upravljanja objektima u etažnom vlasništvu,
- problem poplava i uloge Civilne zaštite u kontekstu prevencije i saniranja posljedica poplava.

Od većih skupova organizovali smo slijedeće događaje:

22.7.2010.god održan je Okrugli sto u Bugojnu, sa preko 30 predstavnika Civilne zaštite, izabranih predstavnika i NVO, na temu «Aktuelna situacija u oblasti zaštite i spašavanja ljudi i materijalnih dobara od prirodnih i drugih nesreća u Srednje-Bosanskom kantonu sa posebnim osvrtom na problematiku poplava» koji je dao dobru osnovu za dalji rad na temu unapređenja rada Civilne zaštite u smjeru problematike poplava.

8 – 9.12.2010. godine održano je Savjetovanje/Radionica pod nazivom „Unapređenje kapaciteta za zaštitu i spašavanje ljudi i materijalnih dobara od poplava u slivnom području rijeke Vrbas“. Za razliku od ostalih aktivnosti u ovom slučaju uključeno je šest opština jer se ova vrsta problema ne može posmatrati kao pitanje jedne teritorijalno - administrativne jedinice. Pored Bugojna i Travnika uključene su još i lokalne zajednice Viteza, Gornjeg Vakufa – Uskoplja, Donjeg Vakufa i Jajca koje čine jedinstveni prostor na kojem se u slučajevima poplava može koordinisano djelovati.

Na Savjetovanju je bilo prisutno preko 70 učesnika a pored predstavnika svih nivoa civilne zaštite preko Ministarstva sigurnosti BiH, Federalne uprave i Uprave CZ SB Kantona, Opštinskih štabova, učešće uzeli i predstavnici ekspertnih organizacija Hidrometeorološki zavod FBiH, Fond za zaštitu okoliša FBiH, Centar za sigurnosne studije te izabrani članovi Predstavničkog doma Parlamentarne skupštine BiH i Parlamenta Federacije BiH, iz izbornih jedinica koje pokrivaju ovaj region, parlamentarci Skupštine SB Kantona, predstavnici Opštinskih Vijeća Gornjeg Vakufa, Viteza, Travnika, Donjeg Vakufa, Bugojna i Jajca, predstavnici nevladinog sektora, mediji.

Kao posebno priznanje za uloženi trud u organizaciji, odabranu temu i dalje planove vezano za praćenje provođenja donesenih Zaključaka Centar za promociju civilnog društva je dobio Zahvalnicu od Kantonalne uprave CZ SB Kantona u povodu dana CZ 25.02.2011.god.

Vrijedno je istaći i da je CPCD uradio kvalitetnu analizu zakonodavne problematike u oblasti upravljanja objektima sa etažnim vlasništvom i naredni koraci će ići prema novoformiranim kantonalnim vlastima kao i lokalnim upravama Bugojna i Travnika, kako bi se izvršile neophodne korekcije i dopune postojećih dokumenata i prešlo na regulisanje problema implementacije sistema upravljanja koji generalno ne funkcioniše. U ovom smislu planiramo i široku kampanju zagovaranja od strane NVO sektora sa ciljem podizanja svijesti građana o navedenom problemu jer je evidentno da su pored vlasti, loših propisa i firmi zaimplementaciju, građani sa svojim odnosom prema ovoj problematici, dio problema a ne rješenja.

U narednim kontaktima sa kancelarijom grada Lajpciga i lokalne uprave Travnika dizajniraće se dalji koraci u smjeru izgradnje pretovarne stanice u regionu i podmirivanje potrebe za reciklažom otpada za više opština te smanjivanje troškova odvoza krutog otpada na regionalnu sanitarnu deponiju u Zenicu.

Općina Bugojno ima dobru praksu u implementaciji Sporazuma o saradnji između načelnika, općinskog vijeća i organizacija civilnog društva u općini Bugojno, gdje nevladine organizacije imaju veliki uticaj u procesu donošenja odluka i uključene su u sve procese od značaja za zajednicu.

U općini Bugojno, nakon održanih sastanaka sa načelnikom općine i pomoćnicima, predstavljanju projekta održan je zajednički sastanak sa lokalnim organizacijama civilnog društva i predstavnicima općine. Tom prilikom zajedničkim radom definisana je prioritarna potreba ove općine te izabrana radna grupa sastavljena od predstavnika općine i lokalnih organizacija civilnog društva. Radna grupa je pristupila izradi akcionog plana u cilju rješavanja definisanog lokalnog problema koji uključuje kreiranje kampanje, zajedničko istupanje ka državnom parlamentu, lobiranje i zagovaranje uz punu podršku lokalnih organa vlasti.

Isti proces i način rada u okviru ovog projekta planiran je da bude sproveden i u općini Travnik

DIJALOG I SARADNJA VLADE I OCD U KANTONU SARAJEVO -STRATEGIJA ZA USPJEH-

Donator: Fond otvoreno društvo BiH

Ovaj projekat predstavljao je nastavak aktivnosti koje je Centar za promociju civilnog društva (CPCD) realizovao tokom 2008. i 2009. godine u okviru projekata „Monitoring javnih politika u Kantonu Sarajevo” i „Veće učešće organizacija civilnog društva u procesu kreiranja javnih politika u Kantonu Sarajevo”, uz finansijsku podršku Fonda otvoreno društvo BiH. Osnovni pristup i cjelokupni dizajn ovog projektnog prijedloga zasnivao se na stečenim iskustvima, naučenim lekcijama, najvažnijim rezultatima i dostignućima ostvarenim u realizaciji ova dva predhodna projekta.

Osnovna svrha projekta je bila primjena već usvojenog Sporazuma o saradnji Vlade i NVO sektora u Kantonu Sarajevo (Sporazum), njegova dalja izgradnja i podrška zagovaračkim i drugim civilnim inicijativama usmjerenim na praktičnu primjenu osnovnih vrijednosti i principa Sporazuma u svakodnevnim odnosima predstavnika Vlade i civilnog društva u Kantonu Sarajevo.

Potpisivanje Sporazuma bio je značajan, ali tek prvi korak u izgradnji institucionalnih kanala za razvoj dijaloga i partnerske saradnje između predstavnika ova dva sektora. Već u samom Sporazumu je definisano da prvi korak u njegovoj primjeni treba da bude formiranje Savjeta za saradnju Vlade i NVO sektora u Kantonu Sarajevo, te imenovanje Ureda/osobe zadužene u ime Vlade za saradnju sa NVO sektorom.

U preporukama Analize dostignutog stepena saradnje Vlade Kantona i NVO u Kantonu Sarajevo, koja je bila prvi korak u procesu izrade Sporazuma, naglašeno da je neophodno poslije izrade i usvajanja Sporazuma o saradnji između Vlade i OCD u Kantonu Sarajevo, te formiranja Savjeta i Ureda pristupiti izradi i usvajanju Kodeksa dobre prakse o konsultacijama, kojim će se jasno definisati načini učešća građana u procesima kreiranja javnih politika, te Kodeks dobre prakse o finansiranju NVO-a iz Kantonalnog budžeta.

Dosadašnja praksa Sporazuma je sugerisala da je za njegovu uspješnu primjenu neophodno da svi učesnici u procesu budu obaviješteni o činjenici da je Sporazum potpisan i usvojen, da poznaju njegov sadržaj i ciljeve, te da imaju svijest o koristi koju od njega mogu imati u svom radu i međusobnim odnosima. Polazeći od ove premise, jedna od prvih projektnih aktivnosti je bila izrada i štampanje brošure Sporazum o saradnji Vlade i NVO sektora u Kantonu Sarajevo, s ciljem da se sa Sporazumom upozna i pristupi mu što veći broj predstavnika vladinog i NVO sektora u Kantonu Sarajevo. Brošura je štampana na bosanskom, srpskom, hrvatskom i engleskom jeziku, u tiražu od 800 primjeraka. Na svečanosti potpisivanja Sporazuma održanoj 24. marta 2010. godine u Domu mladih Skenderija, Sporazum su potpisali pored premijera Besima Mehmedića ispred Vlade KS i Mirjane Sirćo kao ovlaštene predstavnice Mreže „Sporazum plus“, i svi ministri u Vladi KS i predstavnici svih nevladinih organizacija članica Mreže. Činom potpisivanja Sporazuma od strane svih aktera ovog procesa on je postao „zajedničko vlasništvo“ oba sektora društva.

Brošura je široko distribuirana službenicima u svim ministarstvima Vlade Kantona Sarajevo, poslanicima u Skupštini Kantona Sarajevo, članovima skupštinskih radnih tijela, premjerima i predsjedavajućim skupština u drugim kantonima u FBiH, premijeru FBiH i predsjedavajućim Predstavničkog doma i Doma naroda Parlamenta FBiH, NVO, članicama kantonalne i državne Mreže „Sporazum plus“, te svim drugim NVO nevladinim organizacijama iz naše baze podataka.

Rezultat ovih aktivnosti je kontinuirano povećanje broja nevladinih organizacija koje su pristupaju Mreži i Sporazumu, te povećan interes predstavnika vlasti za saradnju sa NVO sektorom. Tako od 43 organizacije, koliko ih je bilo u momentu potpisivanja, sada imamo 78 nevladinih organizacija članica Mreže koje su potpisale i pristupnicu Sporazumu. Pored toga 9 organizacija potpisalo je samo pristupnicu Sporazumu.

Zbog činjenice da su u ovom periodu provedeni Opći izbori i da je došlo do formiranja nove vlasti u Kantonu Sarajevo, morali smo uložiti dodatne napore da se sa suštinom inicijative o uvođenju nove demokratske prakse u odnosima između vladinog i nevladinog sektora i ciljevima projekta upoznaju novoizabrani predstavnici izvršne i zakonodavne vlasti. Doštampano je još 200 primjeraka brošure i dostavljeno novoizabranim nosiocima izvršne i zakonodavne vlasti u Kantonu Sarajevo.

Istovremeno, održali smo niz informativnih i promotivnih sastanaka „Doručak uz Sporazum“ za uposlenike pet ministarstava Kantona Sarajevo s ciljem da se i oni upoznaju sa sadržajem Sporazuma te da imaju svijest o koristi koju od njega mogu imati u svom radu. U ovim ministarstvima identifikovani su „šampioni Sporazuma“, osobe koje će dalje promovisati međusektoarsku saradnju kroz dosljednu primjenu Sporazuma.

Takođe, konkretne akcije koje smo proveli: Uključivanje u javnu raspravu o prednacrtu i nacrtu Zakona o lokalnoj samoupravi, Odluci o korištenju toplotne energije u Kantonu Sarajevo, nastavak aktivnosti na praćenju efekata uštede javnog novca primjenom Odluke o nižim cijenama lijekova koji se izdaju na teret Zavoda zdravstvenog osiguranja Kantona Sarajevo (ušteda 7,5 miliona maraka u toku ove godine efektivno, a 13,5 miliona na osnovu analize povećanog broja recepata) kao rezultat kampanje „13 miliona razloga za odluku“ pokazale su kako nevladine organizacije mogu dati veliki doprinos u kreiranju javnih politika i poboljšanju usluga koje vlasti pružaju građanima. To je imalo za rezultat da vlasti shvate potrebu dalje izgradnje inistitucionalnih kanala za veće učešće građana i NVO u procesima donošenja odluka, te je Vlada Kantona Sarajevo donijela Odluku o formiranju Vladinog Ureda za saradnju sa NVO sektorom i Odluku o imenovanju 13 članova u sastav Savjeta za saradnju Vlade i NVO sektora u KS.

Mreža „Sporazum plus“ KS je u skladu sa čl. 10 Sporazuma provela proceduru predlaganja kandidata u sastav Savjeta ispred NVO sektora, i do konačnog formiranja Savjeta ostao je još samo jedan korak – potvrđivanje imenovanja kompletnog saziva Savjeta od strane Vlade KS.

Formiran je prvi Vladin Ured za saradnju sa nevladinim organizacijama u BiH, mada do sada imamo više od 80 sklopljenih sporazuma o međusektorskoj saradnji na različitim nivoima vlasti u BiH (Sporazum o saradnji Vijeća ministara i NVO sektora u BiH, preko 70 sporazuma na lokalnom nivou u oba bh. Entiteta, te u Bosanskojpodrinjskom kantonu).

U okviru pripreme za izradu Kodeksa dobre prakse/Pravila o učešću građana u donošenju odluka održan je 25. februara 2011. godine Forum: Dobre prakse i evropski standardi vezano za informisanje, konsultacije i načine uključivanja građana i OCD u procese donošenja odluka i kreiranja javnih politika. Učesnici Foruma su pored članova Mreže „Sporazum plus“ bili i članovi budućeg Savjeta za saradnju Vlade i NVO sektora, predstavnici izvršne i zakonodavne vlasti u Kantonu Sarajevo.

U organizaciji Foruma koristili smo strategiju usvajanja znanja koja je zasnovana na razmjeni iskustava između predstavnika vlasti i NVO sektora, a koju smo primjenjivali i tokom procesa izrade i usvajanja Sporazuma o saradnji Vlade i NVO sektora u Kantonu Sarajevo. Ovakav način rada pokazao se kao djelotvoran u smislu koordinacije i boljeg međusobnog razumjevanja predstavnika ova dva sektora koji su tokom ovog procesa učili jedni od drugih, a što je imalo za rezultat bolje razumjevanje inicijative nevladinog sektora za uspostavljanje institucionalnih mehanizama za razvoj međusektorskog dijaloga i partnerske saradnje. Rezultat Foruma su bile urađene Smjernice za naredne aktivnosti na primjeni Sporazuma o saradnji Vlade i NVO sektora u Kantonu Sarajevo u 2011.godini, vezano za potvrđivanje imenovanja Savjeta, rad Ureda i izradu Kodeksa dobre prakse/Pravila o učešću građana u donošenju odluka..

Tri seminara koja smo organizovali za članice Mreže „Sporazum plus“ Kanton Sarajevo o budžetskom procesu u BiH, imale su za cilj da se OCD upoznaju sa budžetskim reformama koje su u posljednjih sedam godina provedene u BiH i mogućnostima kada i kako da se i same uključe u ovaj proces. Rezultat ovih aktivnosti je izrada tri prijedloga nove budžetske potrošnje ispred Mreže „Sporazum plus“ KS za DOB Kantona Sarajevo 2012-2014. godine, urađena u programskom formatu i uz konsultacije sa resornim ministarstvima na koja se prijedlog adresira. Takođe, seminari su otvorili

mogućnost članicama Mreže da se na kvalitetniji način uključe u javnu raspravu o Nacrtu Budžeta Kantona Sarajevo za 2011. godinu.

Zbog činjenice da su tokom ove godine provedeni Opći izbori, te kašnjenja u formiranju vlasti donošenje Zakona o lokalnoj samoupravi je ponovo prolongirano. To je bio razlog da pokrenemo akciju STOP NEJASNIM NADLEŽNOSTIMA OPĆINA, GRADA I KANTONA SARAJEVO, s ciljem da se izvrši pritisak na političke stranke koje su dobile povjerenje građana na proteklim izborima da što hitnije formiraju vlast i počnu se baviti ovim izuzetno značajnim zakonom za sve građane Kantona

Tokom trodnevne akcije ispred sarajevske Katedrale, od 22. do 25. novembra 2010. godine, u periodu od 12:00 do 15:00 sati građani su imali priliku da potpišu peticiju kojom se od političkih partija, koje su dobile povjerenje građana Kantona Sarajevo na proteklim izborima, traži hitno formiranje vlasti i usvajanje Zakona o lokalnoj samoupravi kao prioritet. Istovremeno volonteri simbolično obučeni u žute kabanice (žuto svjetlo na semaforu kao znak upozorenja) i sa znakovima STOP NEJASNIM NADLEŽNOSTIMA OPĆINA, GRADA I KANTONA SARAJEVO podijelili su 10 000 letaka sa obrazloženjem građanima šta za njih konkretno znači odugovlačenje sa donošenjem Zakona o lokalnoj samoupravi Kantona Sarajevo.

Naime, odugovlačenje sa donošenjem ovog zakona za građane Sarajevo ne samo da znači lošije i nekvalitetnije usluge u različitim oblastima života, od obrazovanja i zdravstva do komunalnih usluga, već to znači i plaćanje sudskih troškova javnim novcem. Naime, Grad Sarajevo i Općina Centar su podnijele tužbe Ustavnom sudu protiv Kantona Sarajevo za kršenje prava na lokalnu samoupravu. Činjenica da su Grad Sarajevo i Općina Centar dobile ovaj spor, te da su najavljene nove tužbe i drugih općina u Kantonu, dodatni je argument da se ovo pitanje prestane gurati pod tepih i da se krene sa njegovim rješavanjem.

Po završetku akcije organizovano je javno predavanje peticije predstavnicima SDP, SDA, i SBB ispred sarajevske Katedrale uz prisustvo brojnih medija. Obećanje koje su tada javno izrekli da će se vlast formirati tokom naredne sedmice je već ispunjeno, dok sudbina drugog obećanja vezano za donošenje Zakona o lokalnoj samoupravi u Kantonu Sarajevo ostaje tek da se vidi.

CIVILNO DRUŠTVO

ODRŽIVI RAZVOJ NEPROFITNOG SEKTORA U BIH KROZ PARTNERSTVO SA VLADOM I BIZNIS SEKTOROM II

Donator: USAID

Tokom 2010. godine CPCD je u trećoj i ujedno završnoj godini implementacije trogodišnjeg projekta koji u svojim okvirima ima 4 komponente:

- *Unapređenje pravnog i regulatornog okvira za NVO-e,*
- *Povećanje finansijske održivosti NVO sektora,*
- *Povećanje javne podrške civilnom društvu u BiH i*
- *Jačanje kapaciteta CPCD-a kao servisne organizacije*

Partner u realizaciji projekta je Evropski centar za neprofitno pravo iz Budimpešte (ECNL):

U okviru prve projektne komponente realizuju se aktivnosti na daljoj izgradnji institucionalizacije odnosa vladinog i nevladinog sektora na državnom nivou. Sporazum o suradnji između Vijeća ministara BiH i NVO sektora u BiH (Sporazum) potpisan je u maju 2007. godine i predstavlja prvi korak izgradnje novih odnosa vladinog i nevladinog sektora. Sporazum, pored osnovnih principa i načela suradnje, sadrži obaveze i odgovornosti oba sektora uz formiranje dva osnovna tijela pri Vijeću ministara BiH koja preuzimaju pitanja odnosa Vijeća ministara BiH i civilnog društva u BiH a to su Ured za suradnju sa NVO sektorom (Ured) kao operativno tijelo, i Savjet za razvoj civilnog društva, kao savjetodavno tijelo Vijeća ministara BiH (Savjet). U cilju realizacije ove aktivnosti formiran je Tim za primjenu Sporazuma, sastavljen od predstavnika nevladinog, vladinog sektora kao i donatora u BiH koji podržavaju uspostavljanje Ureda i Savjeta na državnom nivou.

Kada je riječ o entitetskom nivou vrijedno je pomenuti da je Vlada RS donijela odluku o pokretanju procesa izrade i usvajanja Sporazuma saradnje sa NVO. CPCD i ECNL su u saradnji sa mrežom NVO okupljenih oko zajedničkog interesa izrade Sporazuma, održali zajednički sastanak sa predstavnicima Vlade RS kako bi prenijeli dobre prakse iz regiona u procesu usvajanja kao i koristi za obje strane u njegovoj dosljednoj primjeni.

Osim na državnom nivou, CPCD je svoje aktivnosti provodio uporedno na lokalnom i kantonalnom nivou. Sporazum na lokalnom nivou je dokument koji uspostavlja institucionalnu saradnju i partnerstvo, kao najviši oblik saradnje, između lokalne samouprave i udruženja građana. Kao i državni Sporazum, i ovaj sadrži prava i odgovornosti kroz obavezne konsultacije kao i transparentan postupak dodjele finansijskih sredstava. Mnoge regionalne konferencije kao i komparativna praksa su pokazale da su, upravo zahvaljujući CPCD-u koji je u proteklim godinama provodio aktivnosti u procesu izrade, usvajanja i implementacije lokalnog Sporazuma, doveo do toga da BiH važi za državu koja na lokalnom nivou ima jednako dobre ili bolje prakse od zemalja u regiji. U narednom periodu imperativ će biti rad na dubljoj primjeni ovog Sporazuma, uz dizanje kapacitete oba sektora kako bi implementacija imala što puniju i bolju primjenu. Usvajanje novih lokalnih Sporazuma u općinama koje nemaju nikakva pravila ostaju također jedne od aktivnosti CPCD-a koja će se za razliku od prethodnih godina dijelom obavljati preko partnerskih NVO-a ali i općinskih službenika koji već imaju izgrađene kapacitete za proces izrade, usvajanja ovog dokumenta. Izgrađivanju kapaciteta iz oblasti institucionalne izgradnje, saradnje i partnerstva između

vladinog i nevladinog sektora doprinos je dao i petodnevni trening za trenere u organizaciji CPCD-a čiji su učesnici bili iz prakse prepoznati predstavnici oba sektora u ovom procesu.

Formiranje Mreže „Sporazum plus” u cilju facilitacije između ključnih aktera uključenih u proces izrade, usvajanja i implementacije Sporazuma u BiH je bila jedna od ključnih aktivnosti. Do kraja 2010. godine, 435 NVO iz cijele BiH je pristupilo članstvu Mreže. U svrhu lakše razmjene dobrih praksi i izrađenih rješenja na svim nivoima vlasti, te brže distribucije informacija, izrađena je stranica www.sporazum.ba koja sadrži navedene podatke u svim općinama, kantonima, oba entiteta te državnom nivou. Stranica će se vremenom popunjavati informacijama, a prvenstveno će je koristiti svi nivoi vlasti u BiH, članice Mreže „Sporazum plus” ali i sve druge organizacije civilnog društva te donatorska zajednica u BiH. Nakon izrade i usvajanja osnivačkih dokumenata mreže, Povelje o osnivanju i Statuta, te održavanja Konvencije Mreže i izbora prelaznog Koordinacionog odbora, Mreža je održala 4 foruma na kojima su definisane „Preporuke- za izgradnju partnerstva bh. vlasti, civilnog društva i Evropske unije u procesu EU integracija” (Preporuke) koje sadrže po 10 preporuka pripadnicima civilnog društva u BiH, vlastima i Evropskoj komisiji, te 4 preporuke donatorskoj zajednici u BiH. Inovativna je bila distribucija Preporuka građanima u BiH na način da su štampane u formi mini EU pasoša, te uličnim akcijama distribuirane u 10 bh. gradova što je bilo medijski odlično praćeno. Dodatno, Preporuke su putem pošte poslone svim nivoima vlasti u BiH kao i drugim ključnim akterima na koje se odnose. Kodeks ponašanja za članice Mreže je redefiniран, bit će usvojen i implementiran kroz Mrežu „Sporazum plus” tokom 2011. godine, nakon diskusije i utvrđivanja konačnog teksta. Mreža je učestvovala u izradi komentara na prednacrt zakona o izmjenama i dopunama Zakona o udruženjima i fondacijama BiH, koji su dostavljeni Ministarstvu pravde BiH.

Po prvi put u BiH, CPCD je promovirao standard kvaliteta za NVO u cilju povećanja kapaciteta i kredibiliteta organizacija civilnog društva (OCD). U prvoj fazi održane su edukacije za predstavnike lokalnih organizacija od strane Slovenačkog instituta za mjeriteljstvo i kvalitet (SIQ). Rezultat ovih edukacija je 15 bh. certificiranih internih auditora sistema kvaliteta. Drugi krug edukacije, za osoblje Resursnog centra i njegovih regionalnih resursnih centara iz Livna, Travnika, Doboja i Prijedora, imao je za cilj dobiti 10 bh. certificiranih menadžera upravljanja sistemom kvaliteta za NVO (vodeći provjerivači). Po izvršenoj edukaciji, CPCD je kroz svoj Resursni centar, i u saradnji sa regionalnim resursnim centrima održao motivacijske sastanke u 7 bh. gradova, na osnovu čega je 120 lokalnih NVO izrazilo želju za procesom usklađivanja svog poslovanja sa standardima sistema kvaliteta. U 2011. godini je planirano proširenje broja uključenih NVO u proces uvođenja sistema kvaliteta, putem posjeta za 45 organizacija u kojima će se definisati mjere poboljšanja rada tih NVO, te putem pružanja besplatnih treninga za sve odabrane NVO u cilju povećanja njihovog nivoa standarda rada.

Sa ciljem povećanja finansijske održivosti OCD u BiH izrađen je i entitetskim ministarstvima finansija ponuđen na razmatranje prijedlog poreskih reformi. Na izradi „male poreske reforme” osim CPCD-a, učestvovali su ECNL iz Budimpešte i CCI.

CPCD je u protekloj godini bio aktivni član radne grupe zadužene za izradu Zakona o volonterima na nivou FBiH. Prednacrt zakona je izrađen, te se nakon formiranja vlasti planira kampanja usvajanja ovog Zakona.

CPCD je od 1.1.2010. godine sekretarijat bh. mreže UN Globalnog Sporazuma (UN Global Compact), zajedno sa organizacijom CSR Plus. Najveća aktivnost tokom ove godine je godišnji sastanak bh. mreže, koji je održan u Sarajevu, 20.10.2010. godine. Sastanku je

prisustvovalo 60 učesnika koji su predstavljali bh. preduzeća, nevladine organizacije, javne institucije, međunarodne organizacije i same organizatore sastanka.

Globalni Sporazum u BiH će u budućnosti funkcionisati putem radnih grupa: Nacionalna strategija društveno odgovornog poslovanja u BiH, Filantropija, Mediji, Životna sredina, Finansijski sektor. Kada se formiraju sve radne grupe članice Globalnog Sporazuma će se moći izjasniti kojoj radnoj grupi će da se pridruže.

RESURSNI CENTAR

Centar za promociju civilnog društva je 2006. godine otvorio Resursni centar civilnog društva, kao odgovor na potrebu postojanja takve intemedijarne strukture koja bi nevladinim organizacijama pružala različite vrste usluga, od treninga, edukacija, različitih vidova pružanja savjeta i konsultacija, prilika za umrežavanje i širu distribuciju i razmjenu informacija.

Misija Resursnog centra je:

Održati konstantan protok informacija između sudionika civilnog društva u BiH.

Ponuditi edukativni program i dugoročne konsultantske usluge po pitanju razvoja civilnog društva.

Profilirati i ojačati status trećeg sektora u BiH.

Doprinjati uspostavljanju saradnje između svih sektora društva.

Podržati proces samoregulacije trećeg sektora u BiH.

Unaprijediti profesionalnost rada lokalnih nevladinih organizacija.

Podsticati regionalnu saradnju na području zapadnog Balkana.

Na osnovu dosadašnjeg iskustva i poznavanja potreba tržišta, Resursni centar je definisao usluge svoga djelovanja, putem nekoliko segmenata.

- Web site www.civilnodrustvo.ba
- Treninzi, mentorstvo i konsultacije
- Usluge
- Umrežavanje

Web: www.civilnodrustvo.ba :

Od samog početka ovaj segment djelovanja se pokazao potrebnim i korisnim. U 2010. godini ovaj je web site zabilježio preko **75000** pojedinačnih posjeta, što ga čini jednim od najposjećenijih sajtova koji pružaju informacije iz oblasti civilnog društva.

U dosadašnjem radu je objavljeno preko **8000** različitih **vijesti**, i preko **4000 informacija** o različitim tenderima, poslovnim ponudama, oglasima i stipendijama. Na sajtu je postavljeno preko **160** različitih publikacija. U toku procesa prikupljanja publikacija izrađen je i poseban DVD sa preko 500 različitih publikacija koje su podijeljene nevladinim organizacijama, partnerima, institucijama i pojedincima, kao i članovima Resursnog centra.

Zbog svoje aktuelnosti ovaj web sajt je postao izvor informacija ne samo za većinu nevladinih organizacija, nego i za brojne studente koji u svojom studentskim istraživanjima koriste sadržaje našeg web sajta.

Web stranica www.civilnodrustvo.ba je proglašena i nagrađena kao najbolja baza podataka u BiH.

Trenizi, mentorstvo i konsultacije:

Tokom 2010. godine Resursni centar je organizovao 7 treninga iz različitih oblasti, od pisanja i izrade projektnih prijedloga, strateškog planiranja, monitoringa i evaluacije, izrade logičkog okvira projekta, Treninga za trenere, uvodne radionice iz Sistema kvaliteta za NVO. Za ove treninge učesnici su bili oslobođeni plaćanja participacije ali su sami snosili troškove puta i smještaja. Učestvovalo je preko 200 učesnika, a za svaki trening je zaprimljeno preko 80 aplikacija, što govori o potrebi za ovakvom vrstom podrške NVO-ima u BiH, posebno organizacijama iz manjih gradova.

Krajem 2010. godine certificirani predavači iz oblasti Sistema kvaliteta za NVO su započeli sa predstavljanjem Sistem kvaliteta za NVO i njegovog značaja za rad organizacije, održavanjem prve od osam prezentacija širom BiH. Na uvodnim radionicama, na kojima se planira prisustvo 240 učesnika, svim zainteresiranim organizacijama će se predstaviti plan rada po kojem će treneri besplatno procijeniti rad 45 organizacija koje su iskazale interes za uvođenjem sistema kvaliteta u svoje organizacije. Završetak realizacije ovog projekta očekuje se sredinom 2011. godine.

Tijekom 2010. godine Resursni centar pružio je konsultantske usluge prema 39 organizacija civilnog društva tijekom pisanja projektnog prijedloga i prihvatanja konceptnog prijedloga od strane donatora. Također, pružene su 33 mentorske usluge organizacijama civilnog društva tijekom implementacije projekata.

U okviru konsultantskih usluga, tijekom 2010. godine, Resursni centar je odgovorio na 20 pravnih upita od strane organizacija civilnog društva.

Usluge:

Više od godinu dana RC ima razvijenu ponudu usluga koju je dosada koristilo preko 50 organizacija. U sklopu ove ponude, Resursni centar je razvio dvije uslužne ponude za svoje članove. Između ostalog korisnici među prvima dobijaju najvažnije i najaktuelnije informacije o dešavanjima u nevladinom, vladinom i biznis sektoru, informacije o projektima, tenderima, oglasima za posao, mogućnost umrežavanja sa organizacijama u BiH i regiji, ali i popust na komercijalne treninge koji se svake godine u vidu specijaliziranih modula organizuju u RC-u.

Resursni centar pruža uslugu iznajmljivanje knjiga iz biblioteke Resursnog centra, koja do sada broji 1031 knjiga. Najčešći korisnici usluge iznajmljivanja literature su studenti i pojedinci koji se bave istraživačkim radom.

Svojim članovima, i svim zainteresiranim kako pojedincima, tako i organizacijama, Resursni centar pruža uslugu iznajmljivanja sale i sve popratne tehničke opreme.

Proširenje rada Resursnog centra:

Posljednje, aktuelne inicijative umrežavanja, i širenja djelovanja RC, odnose se na stvaranje mreže regionalnih resursnih centara u BiH, koja je definirana u septembru 2010. godine, i pomoću koje će više organizacija u BiH lakše dolaziti do podrške Resursnog centra. Regionalni resursni centri su organizacije koje već djeluju u svojim regijama kao resursni

centri, pružajući pomoć drugim organizacijama civilnog društva - CGS Livno, DON Prijedor, CEM Travnik, Topeer Doboj i ORC Tuzla. Tom prilikom definisan je godišnji akcioni plan rada, kao i strateške smjernice djelovanja mreže resursnih centara koje se odnose na edukativne programe, edukaciju, umrežavanje i koalicije, mobilizaciju lokalnih zajednica, facilitaciju i razvoj partnerskih odnosa sa vlastima, razvoj odnosa sa medijima.

U svrhu razvijanja svojih usluga, a s obzirom na ukazane potrebe u BiH, organizirana je studijska posjeta predstavnika regionalnih resursnih centara i predstavnika Resursnog centra Sarajevo, organizacijama u Srbiji (Građanske inicijative, CRNPS, Hajde da, SMART Kolektiv, Omladinski resursni centar u Pančevu).

TACSO projekat

Izgradnja kapaciteta civilnog društva na zapadnom Balkanu i Turskoj (Bosna i Hercegovina, Hrvatska, Srbija, Kosovo, Albanija, Makedonija, Crna Gora, Turska)

<i>Donator: Evropska komisija</i>

Ovaj dvogodišnji regionalni projekat realizuje konzorcijum na čelu sa SIPU International iz Švedske, u kojem je CPCD, zajedno sa HRDF iz Turske, FPLD iz Rumunije i FRDL iz Poljske.

Glavni cilj projekta jeste da poveća kapacitet organizacija civilnog društva (OCD) i da ojača njihovu ulogu u okviru participativne demokratije. Projektne aktivnosti primarno su bazirane na potrebama OCD i njihovim prioritetima identificiranim u procjeni potreba koje je sačinila svaka pojedinačna zemlja uključena u Projekat.

Ovaj projekat asistira organizacijama civilnog društva u prevladavanju brojnih izazova u radu, prvenstveno kroz aktivnosti izgradnje kapaciteta kao što su treninzi, učenje na daljinu, razmjena iskustava, savjetovanje itd, kao i aktivnosti umrežavanja kao što su događaji koji promoviraju partnerstvo i širenje informacija kako na nacionalnom tako i na regionalnom nivou.

Ured TACSO BiH, sa tri zaposlene osobe, smješten je u prostorijama CPCD.

FINANSIJSKI PODACI

Donatori CPCD u 2010. godini

	<i>Donator</i>	<i>Iznos (KM)</i>	<i>Procenat</i>
1.	USAID	385.826	19.70%
2.	SIDA	413.378	21.11%
3.	Otvoreno društvo BiH	90.000	4.6%
4.	Ambasada Kraljevine Holandije u BiH	67.026	3.42%
5.	Chemonics	697.000	35.59%
6.	Evropska komisija	57.598	2.94%
7.	Mott fondacija	42.000	2.14%
8.	SIPU	79.884	4.08%
9.	SUNY	14.185	0.72%
10.	Vlastito finansiranje	111.517	5.69%

BILANS USPJEHA (KM)	2009.	2010.
A. PRIHODI		
Članarina	1.400	1.560
Prihodi iz budžeta	1.804	0
Humanitarni prihodi	402.848	808.462
Prihodi od vlastite aktivnosti	1.599.495	1.148.393
Ostali prihodi	8.258	0
Svega prihodi	2.013.805	1.958.415
B. RASHODI		
Materijal i energija	37.055	43.142
Usluge	305.615	306.440
Plaće i ostala primanja zaposlenih	1.114.577	1.078.789
Amortizacija	25.813	23.456
Finansijski rashodi	4.641	2.261
Putni troškovi	47.033	32.249
Humanitarni rashodi	291.310	75.130
Porezi i doprinosi koje ne zavise od rezultata	7.858	14.232
Ostali rashodi	73.456	86.043
Svega rashodi	1.907.358	1.661.742
C. REZULTAT		
Višak prihoda	106.447	296.673

BILANS STANJA (KM)	2009.	2010.
AKTIVA		
A. STALNA SREDSTVA	71.592	55.979
Nekretnine, postrojenja i oprema	70.392	55.979
Nematerijalna stalna sredstva	1.220	0
Dugoročni plasmani i potraživanja	0	0
B. TEKUĆA SREDSTVA	193.705	585.290
Novac i novčani ekvivalenti	119.343	352.142
Kratkoročni plasmani i potraživanja	73.402	232.188
Zalihe	960	960
Ulazni porez (PDV)	0	0
Kratkoročna razgraničenja	0	0
SVEGA AKTIVA	265.297	641.269
PASIVA		
A. TRAJNI IZVORI	133.941	430.614
Trajni izvori	300	300
Rezerve	0	0
Neraspoređeni višak prihoda	133.641	430.314
B. DUGOROČNE OBAVEZE	0	0
C. KRATKOROČNE OBAVEZE	131.356	210.655
Tekuće obaveze	17.539	32.310
Kratkoročne finansijske obaveze	0	0
Obaveze za PDV	84	0
Kratkoročna razgraničenja	113.733	178.345
SVEGA PASIVA	265.297	641.269